

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsoabasotho.co.ls

O sia mohope
oa metsi



3

Ba futuheloa
ke mofetše

6

Ba tlala
litsi



7



BA RE QHA!

5

www.moeletsoabasotho.co.ls

Moeletsi oa Basotho



Re se re fumaneha ho
marangrang

Email: newsroom@moeletsoabasotho.co.ls
Tel: +266 28350466/ Whats app: 62600983

MOELETSI

Phethang litšoanelo

Kamor'a matsatsi a phomolo ea Keresemese le Selemo se Secha, seo re tšepang ruri hore le phomotse hantle, mokhethoa oa Ha Matala o hlomela mahokela a sebaka sa habo ka lihlobo tse tla a thusa ho phetha mosebetsi. Mohlomong sena o se etsa a ipapisitse le liqholotso tseo a boneng a kopana le tsona matsatsing ao hobane litlokotsebe li nka monyetla. O fane ka thepa e tla bebofatsa mokhoa oa puisano le khokahano lipakeng tsa ona, e le hore ha ho na le mokhosi ba tsebe ho potlakela teng ka bangata kapele. Mookameli oa mahokela sebakeng seo o lebohile thepa ena 'me a bontša hore ba se ba hatetse pele haholo boipolesong ba bona. Leha qholotso e le nyenyane ea lequjoana le boemelong ba likoloi hona Ha Matala, empa le eona ba se ba le haufi haholo le ho e hlola.

Litichere li ipiletsa ho batsoali ho phetha tšoanelo le boikarabello ba bona mabapi le thuto ea bana. Ba re batsoali ba fane ka tšehetso ho bana, hobane ngoana ea fumanang lerato le likhathatso ho batsoali oa bonahala ka sehlopheng; o ba le thabo le thahasello mosebetsing oa hae oa sekolo. Ho feta mona ba kopile 'muso ho fana ka bahlabolli likolong hobane ho bonahala bana ba bangata ba e-na le khatello ea maikutlo. Eo ba hlokometseng e bakoa hara tse ling ke maemo a ka lapeng, e ka ba ho se utloane ha batsoali kapa bofuma boo qetellong batsoali ba siang bana ba le bang ha ba il'o fata metsuntsunyane. E 'ngoe ntlha ea bohlokoa eo ba entseng khopotso ho 'muso ke hore o romelle libuka le lijo ka nako likolong hobane sena se liehisa ho buloa ha likolo. 'Muso o arabile ka hore o mothating oa ho bona hore tseo tsohle li'a phethahala.

Qhaqhang-qhang eane e qalileng ngoahola kahar'a Mokhoa oa Liketso le Bophethahatsi (BAP) e ntse e tsoelapele, moo mohlatsi oa moetapele 'moho le moparamente e mong ba ngotseng lengolo le arabang ao b'a fuoeng a ho behelloa ka thoko ho mokha lilimo tse 7 le tse hlano ka tatellano. Ho se lumellane le qeto e joalo ke ka mabaka a latelang, qeto e joalo e lokela ho nkoa ke seboka se sehlo ho feta moo litaba tse joalo li ntse li le kapel'a Makhotla a Molao. Mokha ona o re o leleka batho bao hobane ba sitiloe ho iponahatsa kapel'a Komiti ea Khalemo.

Mohlatsi oa moetapele o bontša ha mokha ho shebahala o se o nkile mothinya o sele, boetapele bo se bo etsa liqeto tse seng molemong oa mokha. Ka hona bona ba ile ba ea sechabeng mabapi le maemo ana 'me ke mabotooa a 28 a kopileng seboka se ikhethang. Ba re ho latela temana ea molao oa motheo oa mokha, ha mabotooa a se entse kopo e joalo boetapele bo lokela ho phethahatsa hang-hang.

Re leboha Mokhatlo oa Basebetsi (LEWA) o atlehileng ho tsekela marena litokelo tsa ona haholo tsa meputso tse phelisang, eo e leng khale haholo a lla ka ona. Morena oa Sehlooho oa Matšekheng o opile khomo lenaka ha re, ho ne ho sa hlokahale hore mokhatlo o tsekele marena litokelo empa ha ho nepahetse 'muso ka lekala le ikarabellang o n'o lokela hore o phethahetse le ho hlokomela marena. E mong oa marena a tla imona monoana katlehong ena o lebohile haholo 'me a re o na le tšepo e tiileng ea hore tse ling tsa lithoko tsa bona joaloka libaka tse nang le seriti, li tla arabeloa ha nko e ntse e-ea.

Basebetsi ba mehleng ba merafo ba bile kapel'a Komiti ea Boiketlo ba Sechaba ho kopa 'Muso oa Lesotho ho lesa ho hulanya maoto mabapi le lichelete tsa batho ba ileng ba sebetsa merafong. Ba re batho ba sitoa ho fumana litsiane tsa bona hobane ba se na litokomane tse feletseng kapa ba sokolisoa kaboomo. Ba se ba ipiletsa ho bohle ba ikarabellang ho pheta tšoanelo ea bona hobane qetellong lichelete tsena li tla felloa ke nako, ebe mofufutso oa Basotho o fella boeeng joaloka oa ntja.

Ba merafo ba tiisa ka hanong



Nthabeleng Seitlheko

Basotho ba ke ke ba sebetsa merafong kathata, ka nako e telele ba khutlela kahar'a naha ea habo bona ba kula ebe qetellong ha ba lokela ho fumana matšelisio ba isoa holimo le tlase le ka litšitiso tse ka lokisoang ke 'Muso oa Lesotho. Litaba tsena li boletsoe ke, Mookameli oa Lekhotla la Basebetsi ba Mehlang ba Merafo Dr. Clifford Molefe tulong ea bona le Komiti ea Boiketlo ba Sechaba, ka la 8 Pherekhong monongoaha.

O re boholo ba basebetsi ba mehleng ba merafo ba lula ba tšepisoa ho lefshoa kamor'a ho fumanoa ba e-na le lefu la lefuba la matšoafo empa ha ho nko ho tsoa lemina ka lebaka la bothata ba ho fumantšoa litokomane tse lokelang ka nako le ho fumana lichelete tseo ka liphelelo tse boima.

O re ke Basotho ba bangata ba sebelitseng naheng ea boahelani ba lokelang ho fumana matšelisio empa ha ho letho leo ba le fumanang e leng se amang bophelo ba sechaba. A re khaello ea litokomane ke e 'ngoe ea

pharela e sitisang Basotho ho fumana lithuso kaha libakeng tse ling ba beheloa nako eo ba lokelang ho isa litokomane ka eona, hoo e reng ha ba fetiloe e be ba fetiloe.

O re e sale ho thoe chelete e teng, ha ho e kenang kapa e tsoang, leha batho ba tseba hore ba boemong bofe ba bokulo, ka lebaka leo ba kopa namo ho 'Muso

tse joalo bo tla imolla le mebuso hobane ho na le chelete e tla kena kahar'a naha, e le matšelisio ho Basotho. O re ke nako e telele ba lelekisa hore Basotho ba fuoe chelete tsa bona empa ba ikarabellang ba shebile hore qetellong chelete eo e felloe ke nako Basotho ba sa e fumana.

Mookameli oa Teba Kabi Moeletsi, o itse bothata bo



oa Lesotho ho loanela hore basebetsi ba merafong ba fumane litsiane tseo ba li hlokanang, hobane lichelete tsena li tl'o qetella li felloa ke nako.

Mookameli oa Mokhatlo oa Basebetsi ba Mehlang ba Merafo Rantšo Bantši, o hlalositse hore ba tšoenyehile ke ho bona 'muso o hata butle ha o lokela ho namolela Basotho le ho loanela hore ba qetelle ba fumane litsiane tsa bona haholo tsa ho angoa ke lengole la merafo. A re naha e imetsoe ke ho oka bakuli ba lefuba, 'me ba bang ba bona ke ba tlleng ba kula merafong. A re boteng ba lichelete

bong boo ba tobaneng le bona ke ba batho ba liehang ho fumantšoa litokomane ke 'Muso oa Lesotho hore ba tsebe ho thuseha hoo lintho tse ling li qetellang li felloa ke nako.

Mookameli oa Komiti ea Boiketlo ba Sechaba Mokhothu Makhwanyane, o hlalositse hore ba ntse ba lokisetsa ho ea fana ka tlaleho 'mokeng oa linaha mabapi le taba ena, o tla ba ka Tšitoe 2025, ha ba ntse ba kopana le mafapha ohle a amaheng le linaha tsohle tse amehileng ke boemo bona ho bona hore lichelete tsena tse faretseng li fela li tla matsohong a Basotho.

Contacts: +266 28350 466 / 6260 0983 (Whats app)
Email: moeletsioabasotho@gmail.com



Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaana
(+266) 28 350 466/ sales@moeletsioabasotho.co.ls

Newsroom

Nthabeleng Seitlheko 57 665 038/ 68 216 721
nthabeleng.seitlheko@moeletsioabasotho.co.ls

Tšelisio Thakholi (Sports) 58 540 853/ 63 480 404
tseliso.thakholi@moeletsioabasotho.co.ls

newsroom@moeletsioabasotho.co.ls

Production Desk 'Mateele Liqa

O sia mohope oa metsi



Nthabeleng Seithleko

Sepolesa sa Lesotho sa matšolo a ikhethang, se inotse mohlankana ea lilemo li 24 oa Lithabaneng, kahar'a letamo la Mejametalana kamor'a ho noela a ntse a sesa le metsoalle ea hae. Litaba tsena, li bile ka la 7 Pherekhong monongoaha.

Mohlankana enoa o tlalehilo ke metsoalle ea hae, pejana a ne a ntse a sa sese a lutse tlas'a sefate

empa khabareng, a kena ka metsing ke moo a ileng a hanella ho fihlela e mong a leka ho mo thusa empa le eena a tobana le bothata hoo a ileng a thusoa ke ba bang hore a pholohe.

O re motsoalle oa bona o ba thobetse kaha ba ne ba e-na le merero 'moho le ho bona hore bophelo ba bona bo tla tsoeella. A re ba ithut-ile bohlokoa ba ho tseba ho sesa, ka hoo, seo ba tlang ho se etsa ke ho ithuta le hore ba se ke ba bapalla li-bakeng tse kotsi.

Ntat'a mofu Lehloenya Makhoa, o hlalositse hore o ile a utloela ka metsoalle

ea ngoan'a hae hore eo o haneletse ka letamong, 'me a tloa matjato le hoja a ile a tea kalala. O re mor'a hae o hlokahala tjena, a sa tsoa kopeloa mohope oa metsi.

O re o tšoenyehile ka ketsahalo ena kaha bana ba bonahala ba sa utloe ha ba khalemeloa. A re ho bohlokoa hore bana ba tsebe hore lintho tse ling li kotsi, li bile li na le litlamorao.

E mong oa baahi sebakeng sena Thabo Nthejane, o itse letamo lena le kotsi sechabeng kaha batho ba atisa ho noela ka ho lona. A re ha ba khalema, bana ha ba mamele kaha ba ba hlaloesetsa hore ho ke ke ha etsahala letho.

A re ba qetella ba se ba sa ba thuse leha tsietsi e hlahile kaha e le bana ba sa mameleng. A re ha li se li etsahetse kaha ho ameha bana ba metse e fapakaneng ba ea ba leleka hore ba il'o bolella batsoali ba bona eseng bona. O re letamo lena le lokela ho sireletsoa hore le batho ba fetang ka tsela ba se ke ba ameha.

E mong oa liqoili P/C Tseko Mosenola, o re bana ba lokela ho ikhalema le ho mamela ha ba khallengoa hobane taba eo e kotsi ho bona. A re Basotho ba lokela ho bapalla hole le metsi

haholo nakong ena eo lipula li nang ka bongata.

A re metsi a kotsi ka hona ho ntse ho le bohlokoa hore ba 'ne ba ithute ho sesa kaha re le naha re potiloe ke matamo le linoka tse ka bang kotsi ho batho ba bangata. O re ba tšoenyehile ke boemo bona kaha bacha e le bona ba bonahalang ba ameha litabeng tsena.

Mothehi oa Mokhatlo oa liqoili Lesotho Neo Malelu, o supile hore litaba tsa ho sesa li lokeloa ho phamoleloa holimo e be thuto e fanoang likolong, ho sibolloe le litlholisano ka ho

fapakana kaha seo se tla thusa hore batho ba phele hobane Naha ea Lesotho e tsetetse haholo litabeng tsa khaho ea matamo. O re ho bohlokoa hore bana ba hole ba koetlisetsoa litaba tse ka bang kotsi ho bona mol-emong oa bophelo bo botle.

O re ho utloisa bohloko hore le lilemong tsa morao tjena, batho ba ntse ba lahlehela ke bophelo ka lahlehela ke bophelo ka lebaka la metsi. "Bacha ba lokela ho kena mekhatlo e tla ba thusa ho tataea bophelong le ho bona hore ba feta liqholotso ka nepo." O boletse joalo.



Batsoali ba tšehetse thutong

Nthabeleng Seithleko

Batsoali ba lokela ho bapala karolo e kholo thutong ea bana ba bona, molemong oa tšebetso e ntle lithutong tsa bona. Litaba tsena, li boletsoe ke e mong oa litichere tse rutang Sekolong se Ikemetseng sa Busy Bees, Maseru, Relebohile Hlalane ka la 7 Pherekhong monongoaha.

"Ha batsoali ba nka boikarabello le ho hlokomela lithuto tsa bana, hlasimoloho, boikarabello le mamelo ho baithuti eba lintho tse etsahalang ha bonolo." O boletse joalo. A ipiletsa ho batsoali ho qoba ho nyenyefatsa tšebetso ea bana ba bona molemong oa ntlafalo, kholo le boiphumano ba bona.

A re ho khothatsa baithuti ho bohlokoa kaha taba eo e etsa ngoana ea nang le boitšepo, ea lutseng torong

ea hae, ea tsebang seo a se hloakang. O re o hlokometse hore baithuti ba bang ba na le khatello ea maikutlo e bakoang ke maemo a mangata, joaloka liqabang tsa batsoali, ho hlorisoa ke baithuti ba bang, ka hona litaba tse-na batsoali ba li hlokomela le ho li tlalehela litichere ha ba bona phetoho baneng ba bona.

O supile hore batsoali ke bona ba ka tšehetsang bana ebe litichere li matlafatsa ketso e joalo. A re selemong sena se secha ba lakaletsa baithuti katleho le mahlohonolo le hore ba qale mosebetsi oa bona ka matla.

Ho sale joalo, Mongoli-Kakaretso oa Mokhatlo oa LAT Letsatsi Ntsibulane, o hlalositse hore litichere li malala-a-laotsoe ho amohe-la barutoana ba bacha le ho tla sebetsa 'moho le Lekala la Thuto le Koetliso ho bona hore ba fihlela sepheo sa thuto e ntlafetseng sebakeng sa ngoana oa mosotho. A re ho ntse ho e-na le likolo tse hloakang baithuti ha tse ling ba le bangata haholo.

O re sena ke sesupo sa phapano eo tsela e fano-



ang ka eona likolong tse ling eleng sekheo se seholo, ho etsa hore thuto e be le tšekamelo, ha likolong tse ling ho na le khaello ea litichere hoo ho ntseng ho e-na le likolo tseo ho rutang tichere e le 'ngoe.

A supa ha ba tobane le phepetso ea tiehiso ea 'muso ea ho isa libuka le lijo likolong e leng se ka amang qaleho ea lithuto ka matla Likolong tsa Mathomo, kaha bana ba bang ba phela ka tsona lijo tsa sekolong.

Mookameli oa Sekolo sa St. James, 'Malipuo Mola-po, o itse o lebeletse ka tše-

po ho nyoloha ha lipalo tsa baithuti sekolong sa habo kaha lithutong tse fetileng ba sebelitse hantle. O re ba ntse ba khothaletsa 'Muso oa Lesotho ho ba hirela bahlabolli likolong hore bana ba tsebe ho thuseha mathateng ao ba nang le ona kaha ho e-na le bana ba nang le khatello ea maikutlo ka lebaka la maemo a malapeng a habo bona.

Ho feta mona, Lekala la Thuto le Koetliso le hlalositse hore le ntse le sebetsa ka thata ho bona hore lijo le libuka li finyella likolong ka nako.



RE TŠEHETSA BACHA

Tšeliso Thakholi

Mosebetsi oa tlhokome-lo le leruo la liphoofo-lo o tsebahala haholo e le mosebetsi oa batho ba banna. Haele batho ba baroetsana bona ba tloaelehile ka ho etsa mesebetsi e meng e kang ea ho roka liphahlo le mopheho, ntle ho ena eo re e boletseng ea leruo liphoofofo. Empa morao tjena baroetsana ba ntseng ba le bacha haholo lilemong ba bonahala ba se ba etsa mesebetsi eo linakong tsa ho feta e neng e tsejoa e le mesebetsi e etsoang ke banna feela.

Rethabile Rasechele oa Ha Foso Seterekeng sa Berea ke e mong oa basali ba ntseng ba le bacha haholo lilemong, ba fokolang ka palo ba itahletseng ka setotsoana leruong la liphoofofo tse kang meutloanyana le lipoli tsa lebeso. E bile o na le litsebo tsa boqapi ba ho etsa litulo le litafole ka lehlaka la noka.

Ak'u bolelle babali hore na mosebetsi oa hau ke ofe?

Mosebetsi oa ka o moholo ke oa leruo la limmutlanyana, lipoli tsa lebeso le linotši, 'me ke qalile ka selemo sa 2023 ka khoeli ea Mphalane hang ha ke qeta ho fumana lengolo la mopheho.

U ne u ile ua susumetsoa ke'ng hore u qetelle u ruile limmutlanyana?

Kamor'a hore ke phethele lithuto tsa ka Sekolong se Seholo sa Lithuto tsa Mahlale sa Limkokwing, e ile eaba ke se ke nyaloa. Ka nako eo ke ne ke e-na le takatso ea ho khutlela sekolong ho ea ntlafatsa lengolo la ka la mopheho, 'me molekane oa ka o ile a fela

a nthusa ho ea sekolong ho ea ithuta haholoanyane ka mopheho. Ha ke qeta o ile a boela a nthusa ka mokhoa oa ho qala khoebo ena ea leruo la limmutlanyana le linotši le ho e tsamaisa kaha a e-na le litsebo tsa ho tsamaisa khoebo.

U sebetsa le eena molekane oa hau? Na u fumana tšebetso e lekaneng ho tsoa ho eena?

Che! Ha ke sebetse le eena kaha ho e-na le moo a hiri-loeng teng ka thoko. Mona re babeli feela le moroetsana e mong eo ke sebetsang le eena. Kannete e hlile o ntšehelitse haholo lintlheng tse ngata tsa tšebetso tse

sa hamonate haholo hoba mosebetsi oa leruo la liphoofofo e sale ke o rata ho tloha khale. Haholo-holo leruo la likhomo tsa lebeso le lipoli tsa lebeso, empa mesebetsi ea mofuta ona haesale e tsebahala haholo ka hore e ka etsoa feela ke bahlankana le banna. Nkile ka sebetsa mapolasing ke hlokomela liphoofofo, 'me ke mosebetsi o monate haholo. Ho feta mona 'na lapeng ke hotse ke alosa liphoofofo kaha e ne e le 'na ngoanana kahar'a bashanyana ba bane.

Ke'ng eo u e ratang haholo ka mosebetsi oo? Ntho eo ke e ratang haholo ke hore letsatsi ka leng

ea limmutlanyana e na le 'maraka o motle. Mona mofuteng oa khoebo u sebetsa le banna le bahlankana ba bangata haholo, taba eo ha u k'u utloe e u beha tsietsing? Che, kannete! Ha nke be ke utloe e le bothata ho sebetsa le bo-ntate kapa bahlankana hoba ke batho ba nang le moea o motle haholo, 'me ba tla u ofa letsoho kahare mabapi le tlhokomelo ea liphoofofo. Pele ke tla mona ke ne ke ee ke utloe batho ba bua ntho li hana ho fela ka khoebo ena empa 'na ha nke ke bone letho.

Ke liqholotso life tsoe u eeng u tobane le tsona?

lo kaha e sale nyenyane ke hona e ntseng e hola.

Na ke mosebetsi oo u ka u khothaletsang batho ba bo-'m'e le baroetsana ho o sebetsa?

E, nka ba khothaletsa haholo hoba hona joale ha ho sa na mosebetsi oo re ka reng ke oa banana kapa bahlankana. Mosebetsi e'a tšoana ho rona bohle ha feela re e-na le lerato la eona. Ke khothaletsa bo-'me' ba ntseng ba le bacha lilemong hore ba tle re tlo'o sebetsa 'moho re phelise malapa.

Keletso ke efe ho bacha?

Keletso ea ka e khutšoanyane haholo ho bacha, ke hore

ha re emeng ka maoto re itšoareleng ka matsoho. Re se khethe mesebetsi ho ea ka moo re bopiloeng ka teng. E kholo ka ho fetisisa ke ho itlhamisetsa mesebetsi e mecha e sa tloaelehang ho latela lineo le litsebo tsa rona.



kang tsa poloko ea libuka, ho mphumanela baji ba lihlahisoa le tse ling tse ngata.

U ee u utloe ho le joang mosebetsing oo oa hau? Na ke mosebetsi oo u o ratang?

Ke ee ke utloe ke sebet-

motho o ithuta ntho e ncha ka tlhokomelo le bophelo ba limmutlanyana le linotši. Ho feta mona ha se mosebetsi o nang le liqholotso tse ngata joaloka mesebetsi e meng, ha feela motho a li hlokometse hantle. Ho feta mona thekiso le nama

Hona le hore ka nako e 'ngoe mosebetsi o se ke oa eba motle haholo ntlheng ea lithekiso, e leng eona taba e sa nthabisang. Baji ba litšebelotso ka nako e 'ngoe ba lieha ho lefa mekoloto ea bona, hoo qetellong sena se ama khoebo haholo

ha re emeng ka maoto re itšoareleng ka matsoho. Re se khethe mesebetsi ho ea ka moo re bopiloeng ka teng. E kholo ka ho fetisisa ke ho itlhamisetsa mesebetsi e mecha e sa tloaelehang ho latela lineo le litsebo tsa rona.

Listen To Us Here

92.6 fm bokamoso Mafeteng Mohale's Hoek Qach's Nek Quthing
97.4 fm bokamoso Maseru Berea Leribe
98.2 fm bokamoso Mokhotlong Thaba Tseka Buthe Buthe

www.bokamoso974.co.za

Ba hana teleko

Nthabeleng Seitlheko

Motlatsi oa Moetapele oa Mokha oa Liketso le Bophethahatsi (BAP), Motlatsi Maqelepo le moparamente Tello Lawrence Kibane, ba tsoetse ka mathe qeto ea Komiti e Kholo ea BAP kamor'a ho fumana mangolo a teleko kahar'a mokha ka le reng, bao ha ba ea iponahatsa kapela komiti ea khalemo. Litaba tsena li hlaheletse lengolong le ngotsoeng, ke Maqelepo la la 7 Pherekhong monongoaha.

Maparamente ana a hlalosa har'a mabaka a mang a entseng hore ba behelloe ka thoko ho mokha ke hobane ha ba iponahatsa kapela komiti ea khalemo ea BAP. Kibane o beheletsoe ka thoko nako ea lilemo tse hlano, e tla fihla pheletsong ka la 7 Pherekhong 2030, ha Maqelepo a behelletsoe ka thoko lilemo tse supileng, kotlo ena e tla

fihla pheletsong ka 7 Pherekhong 2032. Tebello ke hore bao ba se ikamahanye le eng kapa eng e amanang le BAP, mangolo ana a tekentsoe ke motlatsi oa Mongoli e Moholo Mamabusane Qheku.

Ho feta mona, Maqelepo o ntšitse phatlalatso e nang le lisebelisoa tsohle tsa BAP, a khalema ka matla qeto ea komiti ea BAP ka le-reng, ketso eo ke papali fee-

la hobane liqeto li fihleloa ho ipapisitsoe le qeto ea seboka eseng ho sebetsoa ka setsoalle le seeso-oeso.

Lengolo leo a arabileng komiti ea BAP ka lona le re "Ha se ntho e tloaelehileng hore motlatsi oa moetapele a ka ngola lengolo le potolohang, litaba tsa BAP li tlokotsing e tšosang, e le komiti ea BAP ba bitsitse seboka se ikhethang ho tla rarolla boemo bona, litho



tsa komiti ea phethahatso ea BAP ha li sa na lithahasello tsa BAP, ba bile ba leleka litho tsa BAP."

Le tsoetsepele hore likopanong tseo a li tšoereng ke mabatooa a 28 a kopileng hore ho tšoaroe seboka se ikhethang. A re bona ba fumane mangolo a mohlolo a hore ba ea lelekoa kahar'a BAP nakong ea lilemo tse 7, ho bile ho ntse ho e-na le nyeoe e qholotsang ho behelloa ka thoko le ho bitsetsoa lipotsong ba sa tsebe.

Ka hona ha ba nke qeto eo ea komiti ho hang, ba tla itsoella pele ka tšebetso ea bona ho sa natsoe letho. O

re ho ea ka temana ea molao oa motheo seboka se sehlo ke sona se laolang litaba le liqeto tsohle tsa BAP, 'me ha mabatooa a se a bontšitse a hloka seboka se khetheleng, komiti le boetapele bo lokela phethahatsa seo hang-hang.

O re taba ena ea teleko ba tla fana ka mangolo a karabo ho BAP le ho fetisetsa litaba tsa bona ho seboka se khetheleng. A re ha ho tika-tiko hore e tla lahleloa matjoing koana. Ba boetse ba letšolong la ho qhala likomiti tse entsoeng ka molao tsa mabatooa, 'me taba eo ba tla e qholotsa makhotleng a molao, kaha mokha o le tsietsing 'me ba ikemiselitse ho o pholosa haholo sebokeng se khetheleng.

A re ba phethela ka hore ka la 2 Hlakola monongoaha, ba tla ba sebokeng Mohale's Hoek.

Kibane o tiisitse litaba tsena ka hore o filoe lilemo tse hlano a le ka thoko ho mokha, leha ho le joalo h'a ikamahanye le litaba tsena le tsela eo boetapele bo sebetsang ka eona, hobane bo itahlisa seo bo lokelang ho se etsa. A re ba tsebile hantle hore ba se ba behile litaba tsa bona kapel'a makhotla empa ba iphapanyetsa litaba tseo. A re ha lekhotla le ntse le sebetsa taba ena, bona ba ikhethela ho se kene taba eo ba etsa qeto ea bona.

A re ha ho molemong oa bona hore ebe ba ntse ba leleka batho ba nang le bolateli kahar'a mokha, ketso eo e thefula lipalo tsa mokha hampe. A re ba fuoe monyetla oa ho kena kahar'a puso, joale ha ba lokelela ho ipabola b'a loantšana. A re litaba tsena li bakiloe ke hore ha ba sa utloisisana e le boetapele ba mokha.

A re ba bone hore ho le bohlokoa ho bokella maitutlo a sechaba, ho utloa hore na hoa lokeleha hore ebe e ntse e le karolo ea puso kapa che. A re molao oa bona o re ha 30% e kopa seboka ho mokha ho lokela ho ba joalo.

Moroke o khahlametsa mahokela

Nthabeleng Seitlheko

Ele ho kenya letsoho toantšong ea litlolo tsa molao, Mokhethoa oa Ha Matala Dr. Tšelisano Moroke, o nehelane ka liroja-roja, ho mahokela a tikoloho eo. Litaba tsena li bile ka la 7 Pherekhong monongoaha.

O re o etsa sena e le karolo ea ho kenya lintlafatso tšebetsong le ho bona hore sebaka sa habo se bonahalang se ntse se ntlafala se sireletsehe. A re ha ba hloke litlolo tsa molao kahar'a motse tlasa boemo bofe kapa bofe ke ka hoo bohle ba lokelang ho ema ka maoto ho sireletsa metse ea habo bona, ha ba ntse ba loanela ho bona hore lintlafatso li ba

teng metseng.

O re mahokela a tla ba le puisano habobebe le ho matlafatsa khokahano nakong ea tšebetso le ho sebetso ka thata ho bona hore litaba tsa boipoleso metseng e be tse ntlafetseng. O re litlolo tsa molao li bonahala li ntse li theoha, ka lebaka la sechaba se tšoaraneng ka matsoho.

O re tšebetso ea hae ke

ho phethahatsa ka nako tsohle kopo ea sechaba molemong oa bophelo bo botle ba sechaba.

Mookameli oa Sepole-sa sa Lithoteng, Senior Inspector Tumisang Bereng, o babalitse tšebetso e tsoileng matsoho e etsoang ke sechaba sa Ha matala, kaha bana le tlaleho ea motho a le mong ea hloka-hetseng nakong ea phomolo ea kereseme. O rata ho bona ho sena tlaleho e joalo molemong oa bophelo bo botle ba bohle.

Molula-Setulo oa Mahokela Thabo Mphuthi, o hlalositse hore ba tobane le liqholotso tse ngata, leha ho le joalo ba rata ho bona tikolohong ea habo bona ho pheloa ka boiketlo bohle ba loantša litlolo tsa molao. A re ha joale ba saletsoe ke palo e fokolang ea batho ba entseng lequjoana la litlolo tsa molao, mekh'ukh'ung e setopong Ha Matala.

O re leha ho le joalo ba se ba hlotse qholotso e joalo kaha ba etsa sohle ho bona hore bohle ba phela ka bolokolohi.

Tšelisano Lefa, lebitsong la Morena oa Ha Matala, o re litaba tsa litlolo tsa molao li lokela ho fela le hore sebaka seo se lule se hlompheha. A re litaba tseo li ka sebetsahala ka nepo ha ba bone hore sechaba se phelisana ka khotso, le kopano e bonolo, tšepano le bonngoe.



Basotho ba futuheloa ke mofetše

Nthabeleng Seitlheko

Naha ea Lesotho e sebelisa bonyane M400Millione ka selemo bakeng sa kalafo ea mofetše. Lita-ba tsena li hlahetse phetholong ea lekote la khaho ea setsi sa bophelo se tlo se betsana le ho phekoa mofetše, ka la 8 Pherekhong monongoaha.

Molula-Setulo oa Komiti ea Polokeho ea Sechaba, Makhalanyane Mokhothu, o bontšitse hore Naha ea Lesotho e lahlehela ke chelete e ngata ha e lefella kalafo ea mafu ana naheng e 'ngoe, le tahlehelo ea mesebetsi e ba holimo. O re ha mafu ana a ka okeoa kahar'a naha ho tla ba bonolo hore batho bohle ba fumantšoe kalafo ba sa phetse hantle, ka nako e khutšoanyane.

A supa ha ba fihletse taba ena ka thata, hobane le hona joale ho ntse ho e-na le Basotho ba hloka hallang malapeng a bona ka lebaka la ho se fumane kalafo ka nako. Ka hoo a tšepisa hore ba tlo se betsa ka matla ho bona hore sebaka sena se sebetsa ka matla ho fumanela Basotho tharollo le pheko litabeng tsa mofetše.

Letona la Bophelo Mohlomphehi Selibe Mochoboroane, o hlositse hore ba hloka setsi sena se ahoe hona joale hobane ba qholotsoa ke tsela eo lefu la mofetše le amang bophelo ba sechaba, le boturu ba ho okela lefu leo ka ntle ho naha. O itse ba hloka hore chelete e lefella bakuli naheng eo e sebetsoe ka thata ho bona hore e sebetse kahar'a naha ho theha mesebetsi eseng hore Lesotho le ruise linaha tse ling.

O re ha ho oa ba bonolo hore ba fihlele boemo bona kaha leetong la ho thakholoa ha khaho ena, ba thusitse ke komiti ea polokeho ea sechaba, ka hoo ke bonyane M700Millione e lebeletsoeng ho sebelisoa khahong ea setsi sena.

Mookameli oa Plem Construction, Jayakrishnan Nedunghat ea filoeng mosebetsi sebakeng sena, o itse ba tla qala tšebetso 'me ba lebelletse ho sebetsoa 'moho le Basotho le ho bona hore bohle ba tla imona menoana ka tšebetso ea bona.

E mong oa lingaka tsa lefu la mofetše Dr. Kabelo Mputsoe, o re o ile a qala leeto la ho ithuta ka litaba tsa mofetše kamor'a ho bona hore motho ea nang le bothata bona o opeloa haholo. O re khaho ea setsi sena ke karolo ea Jerusale-



ma ea Basotho kaha ho nka nako e telele hore mokuli a fumaneloe pheko, hoo ba bang ba qetellang ba sa e fumane ho hang ka lebaka la linako tseo ba li beheloang, ha ba bang 'muso o lefella litjeo tsa bona ba se ba sa phele.

O re ba lokela ho itšepa e le lingaka tsa Lesotho e seng ba tšepa lingaka tse ling kaha seo se ba amoha matla le botsebi ba bona. Ha joale mokuli oa lefu lena o okoa ka M 220, 000.00. A re re naha e kahar'a tlokotsi ea lefu lena, haholo mofetše oa botona, molomo oa popelo le letsoele.

A re o ne a se a sa khothaletse batho ho hlahloba kaha ho se lisebelisoa, ha setsi sena se ahiloe o tla nolofalloa ke hore bakuli ba hlahlojoe le batho ba boithatelo bo bottle kaha ha ba fumanoa ba e-na le bothata ba tla tseba ho thuseha ka ho panya ha ntsi. A re ka selemo sa 2015 mokuli oa lefu la mofetše o ne a lefelloa M145,000.00, ka hona o leboha hore Basotho ba se ba tla okeloa naheng ea habo bona.

Likhamphani tse abetsoeng mosebetsi ona, ke Plem Construction- GL Civils le Join Venture.

Sechaba se otloa ke maru



Nthabeleng Seitlheko

Mokhethoa oa Hloahloeng, Mohale's Hoek Katleho Mabeleng, o re lebatooa la habo le oetsoe ke koluoa kamor'a ho fumana tlaleho ea hore ke bonyane banna ba 17 ba otlieng ke maru moo ba bane ba ileng ba timela hang-hang ha ba bang ba ntse ba le Setsing sa Kokelo. O boletse tsena, puisanong le Koranta ka la

7 Pherekhong monongoaha.

O re sealuma sena, se hlahile nakong eo sechaba sa sebaka seo se neng se le moketeng lelapeng le leng. O re leha ho le joalo mathoasong a khoeli a Tšitoe ngoahola ho bile le tlaleho ea banna ba babeli Koebunyane ba ileng ba otloa ke maru le matlo a mabeli a ileng a cha. O re litaba tsena li bolutu ka lebaka leo o kopa bohle ho itlhomkela le ho leka ka hohle ho qoba

libaka tse ka bang kotsi.

O re bohle ba lokela ho qoba ho ba lephaka-tlaling le libakeng tse phahameng ba sireletse matlo ka koporo.

'Musi oa Setereke sa Mohale's Hoek Moleboheng Lebele, o itse o tšoenyehile ke boemo bona kaha ba bolokile bafu ba libaka tse fapakaneng. A re litaba tsena li lokela ho emisa, ka hona Basotho ba fumantšoe lithupelo molemong oa ho itšireletsa khahlanong le boemo bona.

A re ofisi ea habo 'moho le Lekala la Ntšetsopele ea Sechaba, ba ntse ba hlophisetsa ho ea tšoarela sechaba sa tikolo tse amehileng tlhabollo le lithupelo ho qoba hore ho eketsehe ea mafu le kameho ea batho ba bang.

Mazenod BOOK CENTRE
22 322 213 / 27 350 562
mazenodbookcentre@gmail.com / bookcentre@mazenodprinting.co.za

Phahana Tloana M195.00
Malebela AS M152.00
A4 M75.00

Mosali a Nkhola: M195.00
Lesotho lea ea: M150.00
Tholoana tsa Sethepu: M130.00

Libuka tsa sesotho

Batšoaruo oa ba tlala litsi

Nthabeleng Seitlheko

Chief Officer Bokang Ramotena, o re Litsi tsa Tlhabollo ea Batšoaruo oa li atetsoe ke tšubuhlellano e holimo ea batšoaruo kaha ba kena ka lipalo tse ngata. Ntle le hore ba kena beke le beke ba tsoang b'a fokola ho late-la linyeoe ka ho fapakana. O boletse tseba puisanong le Koranta ka la 8 Pherekhong monongoaha.

O re tšubuhlellano e ngata hobane libaka tsa bona li ntse li fokola, ho feta mona batšoaruo oa ba qetetse ho fuoa parola khale, hoo le ka ketekelo ea lilemo tse 200 sechaba sa Basotho se thehiloe le nakong ea boipuso ho sa sisinyehang letho. A re ka nako eo ba ee ba atlehe ho fokotsa, 'me ha joale boemo ba lijo ke bo khahlang ha litabeng tsa bophelo bo botle ho ntse ho le hantle kaha bohle ba hlahlobeloa mafu pele ba kopana le ba bang.

A re ho fihlela hona joale ha ho na boemo ba tlakotisi, moo e bang bo ka ba

teng haholo mafu a tšoaetsanang ba tla nka likhato ka nako kaha ba bophelo ba tšoare ka thata ho bona hore batšoaruo oa ba lula ba phetse hantle. O re litsi tsa habo har'a mesebetsi e meng ke ho fana ka tlhabollo eo e reng ha batšoaruo

ba le bangata haholo e be ha e fanoe ka tsela e khahlang hakaalo.

O re ba boetse ba phamisa litalenta le ho ba thakela ka malebela a ho bona hore bao ba qetella ba tseba mesebetsi eo e tla re ha ba tsoa ka setsing ba at-

lehe ho iphelisa le ho phelisa le sechaba.

O supile hore bana ba banyenyane bona, ba kena sekolo ho ba otlela bokamoso ba bona, 'me ba sebetse hantle hobane ba na le thahasello ea ho ithuta. O re takatso ea bona ke ho

bona lipalo tsa batšoaruo e le tse amohelang hore ba nolofalloe ke ho etsa mesebetsi.

Tlaleho e supa ha naha ka bophara batšoaruo oa amohetsoeng ba le 2555; banna ba 2259, basali ba 104 le bana ba 97.



Marena a tla phela

Nthabeleng Seitlheko

Marena a metse hlathe e lelekisa tsebe, kamor'a hore Mokhatlo oa Basebetsi (LEWA) o fihlele tumellano le Lekala la Borena, Tsa Lehale le Sepolesa, Lekhotleing la Tharollo ea likhang tsa Basebetsi, hore a tla nyololeoa meputso selemong sa lichelete sa 2025/2026. Litaba tseba li boletsoe ke Mongoli-Kakaretso oa Mokhatlo ona Hlalefang Seoaholimo, ka la 8 Pherekhong monongoaha.

O re marena joaloka batho bohle ke basebetsi ba lokelang ho phela ka tsela e amohelang, haholo hore ba atlehe ho arabela litlhoko tsa bona nakong ena eo bophelo bo leng boima. A re bao ke karolo ea basebetsi, ba sebetse ka thata ka ho bopa khotso le botsitso ka har'a naha.

Ho ba nyololea meputso o re ke ho ba tlatsa morolo le ho sebetse ka boitelo etsoe ba etsa mesebetsi o matla bosiu le motšoare. A re ba hloka ho bona marena a sebetse maemong a nepahetseng, a sireletsehileng joalokaha ba ile ba thusa batho ba bang mafapheng a mang ho bona hore ba fumana tharollo litabeng tse joalo.

Ho bile le tumellano le Lekhotla e rarollang Likhang tsa Basebetsi (DDPR) hore ho tloha ka khoeli ea 'Mesa monongoaha, marena a ka tlase-tlase a fumanang meputso oa M1,500.00 ka khoeli ba fuoe M3,000.00. A re taba ena ke e khothatsang ka lebaka leo o leboha lekala le ileng la ba mamela.

O ipilelitse ho Marena a Sehlooho ho fana ka mathathamo a marena ohle a sebetse a sa fumane litsiane hore ba tsebe ho hlola boemo bona.

Morena oa Sehlooho oa Matšekheng Morena Peete Lesaona Peete, o bontš-

tse hore khale a le seboko ka litaba tseba, o motlotlo hore marena ao a tla tseba ho arabela litlhoko tsa bona joaloka bohle tšebetsong ea bona. A re ho ne ho sa hloka hore marena a be a buelloe ke mokhatlo kaha 'muso ka lekala le ikarabellang o tseba tokelo ea ona empa kaha ba sa natse litaba tsa bophelo ba batho

ba bang, ba ikhethela ho iphanyetsa boemo.

O re marena a metse ke ona a sebetse ka thata kahar'a sechaba le ona a lokela ho sireletseha, ho bolokeha, ho fuoa tlhompho le seriti libakeng tseo ba sebetse ho tsona. A re ke batho ba bolokang thepa ea bohlokoa ea sechaba empa ha ba na libaka tse ba fang seriti tse hloekileng ho bontša hore borena ke ntho e kholo, ka hoo ba lebohisa bo-mphato'a bona.

Morena oa motse oa Ha Koporala Motanyane Maime, o hlalositse hore marena a metse ke batho ba bohlokoa ba lokelang ho phela joaloka basebetsi kaha ba lula ba bua litaba tsa sechaba, ba li sebetse bosiu le motšoare. A re ntho e bohloko ke hore ba sebetse le libakeng tse se nang chebahalo le lisebelisoa ke bothata, empa o lumela hanyane ka hanyane ba tla fumana likarabo.

27 350 562 / 57396597 (whatsapp)
bookcentre@mazenodprinting.co.ls

Malebela

Mantšatlala

Mophemo

Setho sa Lihlahlani

SESEPEHO-PUO SA SESOTHO 1

SESEPEHO-PUO SA SESOTHO 2

Here's how to access them:

1. Download the Akello Reading App.
2. Search for the book you want.
3. Purchase or subscribe online.
4. Download the book

Enjoy reading offline anytime on the Akello App.

SCHOOL BOOKS

now available on the Akello Online Library!

https://library.akello.co/



TSA KEREKE

Likano le Jubilee

Staff

Ebile thabo le monyaka ha Baitlami ba Mabitso a Halalelang a Jesu le Maria ba nka likano tsa pele le tsa bophelo le ho keteka lilemo tsa bona tsa jubilee ba boiphano le ho tšepahalla boitlamo ba bona. Tsena li bile 'mishoneng oa St. Rose Peka tikolohong ea Leri-be ka la 8 Pherekhong monon-goaha.

lona ke ntoa ea letsatsi le let-satsi, hore 'muso oa Kriste o tsejoe o be o hlompheue ke batho, 'me o hloka boithlamo le boitelo hobane moputso oa bona ba tla o bona mohla Kriste a itlhamisang ho bona. A re kajeno ke letsatsi la thabo e kholo ka hona ba leboha Morena Molimo haele mona a ntse a ba hashaletsa nakong ena ea komello e aparetseng lefatše ea tumelo le ea lipitso.

A re leha ho le thata ha kaa-lo o leboha batho ba bacha

poelano le tlhohonolofatso.

Lebitsong la Mookameli oa Kopano Lesotho Sr. Mary Matobo o lebohile bohle ba nkileng karolo hore ebe mosebetsi ona o ile oa atleha ka makhetho. A re merero eohle e roang ke motho ke Morena Molimo fela a e phethahatsang. A leboha batsoali ba ileng ba lumella le ho fana ka bana ba bona ho tla kahar'a kopano e tlo ba bana ba kereke.

Haele Mookameli e Moholo ea okametseng Lesotho, Canada, Peru le Amerika Sr. Linda Hydock a re o thabetse ho ba



Litšebeliso tsena li simolotse ka Sehlabele se Halalelang sa 'Missa sona se eteletsoepele ke Mohlomphehi Mobishopo Augustinus Tumaole Bane OMI a tlatsitsoe ke baprista ba bangata.

Khothatsong ea hae o ile a re bohle ba ileng ba tsoaoua ka letsoao la sefapano phatle-ng ha ba ne ba hlatsua 'me ba fuoa thomo ea hore il'o ba baphatlalatsi ba Evangeli ea Kriste. A re Molimo o bopile motho e mong le e mong ka morero le sepheo hore motho a tle a mo sebeletse e le hore a tle a putsoe qetellong.

A re ke mona ba ile ba amohela thomo eo ba ileng ba e fuoa, feela ba tsebe hore leetong lena leo ba kenang ho

ba reng ba iphana ho kereke bophelo bohle ba bona, 'me hona le ba bang ba bontšitseng ka liketso tsa phehello hore bophelo bona ba boitlami bo ea tsamaea leha ho ba le meepa 'me Kereke e ntse e kopana le mathata haholo ketepeleng ea eona. A re bana ba ketekeng jubilee ba bontša bonatla ba bona ho ea ka seo ba itlameng ka sona.

A qetella ka hore e se eka bana ba ketekang litšiu tse-na ba ka tsoaetsa ba tlang ka morao, 'me ba tsebe moputso oa bona ba tla o fumana qetellong. A re selemo sena ke sa tšepo, 'me ba be le tšepo ho Molimo mathatateng ohle a bophelo ba bona, hobane jubilee ke nako ea tsoarelano,

karolo ho tla lebohela bana bana ba habo bona. A khothatsa le hona ho thoholetsa boitlamo le botšephehi boo ba bo nkileng ba boiphano kahara kopano esitana le ho kereke ka lilemo tsena tse ngata hakana. A re ba leke ka linako tsohle ho tšepahalla boikano bona ba bona. A leboha le bohle ba bileng teng ketekelong ena ea jubilee hore e tle e be lipaki.

Kopano e amohetse litho tse tharo tse e leng hona li tlo kena koetlisong, tse 5 tse nkang likano tsa pele le a le mong a nkileng likano tsa bophelo e leng Sr. Theresia Mokeretla. Haele Sr. Ernestina Selialia o ne a keteka jubilee ea 25, athe Sr. Catherine Ntoloane o ne a keteka jubilee ea 50.



2024-2025 SELEMO C

MOKETE OA TLHATSUO EA MORENA

Isaia 42,1-4.6-7

Pesalema 28

Liketso 10,34-38

Luka 3,15-16.21-22



Khothatso

Lokisang litsela tsa Morena

Thuto ea Pele ho tsoa Bukeng ea moprofeta Isaia e bua ka boprofeta bo amanang le ho tla ha Messia ea tšepisitsoeng, ebe Evangeli ea Luka e phatlalatsa hore nakong eo Joannes Mohlatsoi a hlatsang Morena Jesu, e ne e le ho supa qaleho ea mosebetsi oa Kriste lefatšeng joaloka Molopolli.

Morena Molimo o bua le sechaba sa hae ka moprofeta Isaia, 'me mehleng eo se ne se tsoa khohelong Jerusalema e le mesarelong (Isaia 49:17, 51:17). Bajudi ba ne ba fetile har'a mahloko le tlhokofatso e kholo. Morena a laela Isaia ho tšelisa sechaba, ho bua le Jerusalema ka bonolo 'me a mo joetse hore o lefile mokitlane oa sebe sa hae hobane o fuoe kotlo habeli.

Lentsoe lena "tšelisa" e hlaha ha 'maloa e le ho bontša mohau oo Morena a tla o bonahatsa ho sechaba sa hae. Morena Molimo o bontša lerato la hae kamor'a ho otlala sechaba nako e telele hobane se ne se mo furaletse. Batho ba bangata ba ka bona kotlo ena e le ketso e bohloko, empa ke nako eo sechaba se neng se e fuoa ho itokisetse kapa ho itlhoekisa. Joale nako ea thabo le khotso e atame-tse eo Morena a tla lopolla sechaba sa hae.

Morena o re, "Lentsoe le hooa felleng le re: 'Lokisang litsela tsa Morena, otlollang mebila felleng.'" Mantsoe ana a lelekela a mang a bohlokoa a hlahang Mangolong a Halalelang. "Tsela" ke mokhoa oa bophelo sebakeng sa motho le Morena Molimo, 'me e ka ba 'meli; o motle kapa o mobe. (Matheus 7:13-4) Joannes Mohlatsoi o ile a hooa felleng hore bohle "ba lokise litsela tsa Morena." (Mareka 1:3) Morena Jesu o ile a bolela hore ke eena Tsela. (Joannes 14:6, Ba-Heberu 10:20) Bokriste ka bo-bona bo bitsoa tsela (Liketso 9:2; 19:9, 23).

Evangeli ea Luka e beha kapele ho lona Joannes Mohlatsoi ea rutang ka Messia. Batho ba neng ba lebeletse ka tšepo ho tla ha Messia ba qeteletse ba ipotsa hore na ebe Joannes ha se eena. Empa ka ho tseba se ka lipelong tsa bona a ba araba a re; "Ea tlang o mpheta ka matla." Mantsoe ana "ea matla" a bolela Kriste mohloli e moholo ntoeng ea Satane. Mona le bona bohlokoa ba Moea o Halalelang o ileng oa theohela holim'a Kriste ka sebopeliso sa leeba, 'me lentsoe la hlaha leholimong nakong ea tlhatsuo ea Morena.

Joannes ha ne a bolela balumeli hore ba tla hlatsua ka mollo, hoo ho ne ho bolela ho lokafatsoa le pholoho, hobane mollo o tsoantša khalalelo. Hape Mangolong a Halalelang mollo hangata o tsoantšo le Molimo-Mopholosi. Kaofela ha re itekoleng hore na re feela re lokisitse litsela tsa Morena e le hore batho bohle ba tle ba be le kabe-lo thabong le khotsong e sa feleng e emetseng bana ba Morena Molimo, ba phetseng tumelong ea bona ho Kriste Jesu.

Bahalaleli har'a Beke

- 13 Pherekhong Elian
- 14 Pherekhong Sava
- 15 Pherekhong Nina
- 16 Pherekhong Melas
- 17 Pherekhong Pior
- 18 Pherekhong Fazzio

Ho tla cha khong



Tšeliso Thakholi

Mafelong ana a beke ho tla cha khong ho sale molora, lipapaling tsa makhahlelo oa bobeli oa Liki e Kholo ea Vodacom tse tlang ho bapalloa mabaleng a fapa-

kaneng kahar'a naha, moo papali e kholo e shebiloeng ka leihlo le nchocho e leng ea Lioli e sireletsang Mohope oa Liki le Mzamane e tlang ho ba Lebaleng la Bambatha, Maseru ka la 11 Pherekhong 2025.

Papali ena e tlalehoa ke bahlopholli ba bolo ea mao-

to e le e tliilo ba thata ka ho fetisisa mokhahlelong ona oa bobeli oa lipapali tsa Liki e Kholo kaha Lioli e shebile ho fetola maoa hore e tle e iphumane e qeteletse e sirelelitse mohope lekhetlo la boraro ka tatellano. Ha joale Lioli e boemong ba bobeli lokong ka lipapali tse

12, e hapile tse robeli, ea bapala ka ho lekana ho tse peli, 'me ea bokelletse lintlha-kholo tse 26 ka mokotleng.

Mzamane e tla papaling ena, e le ha lihloa lekhoa kaha e le maemong a hloabaetsang a bo-15 lokong ka lipapali tse 12, ea hapa e le 'ngoe, ea lahlehela ke tse 11, e bokelletse lintlha-kholo tse tharo ka mokotleng. Ka hona e tlamehile maoto le matsoho ho hapa papali ena, hae ba e batla ho iphumana e ntlafalitse maemo a eona a sa jeseng litheohelang lokong, ka ho tloha sebakeng seo se kotsi seo e leng ho sona. E lokela ho hapa lipapali tsohle tsa eona tsa mokhahlelo ona oa bobeli.

Papali e 'ngoe eo mahalo a tla be a le ho eona ka thata ke e lipakeng tsa Majantja le Matlama, e tlang ho bapalloa Mohale's Hoek ka Sontaha sa la 12 Pherekhong 2025. Majantja e tla be e amohela Matlama e le maemong a bo-11 ka lintlha-kholo tse 14, ha Matla-

ma e le maemong a pele ka lintlha-kholo tse 30. Ha Matlama e ka hlola papali ena, e tla be e iphile monyetleng o moholo oa ho iphumana e hlophile Lioli Mohope oa Liki.

Manonyane e bona-halang e kapile mollo ho tloha ha liki e qala ngoahola, e tliilo qothisana lehlokoa le Machokha. LDF e boemong ba bohloko e tla bapala le Liphakoe ha LCS e tla momana habohlolo le LMPS. Haele Bantu e kopane le Ace Maseru e boemong ba ho qetela lokong. Haele Lijabatho e lilelang lebeso le qhalaneng ka ho leleka mokoetlisi ngoahola, e tla botsana lipotso le LU. Lijabatho e ne e le monyetleng o motle oa ho ba kahar'a lihlopha tse 'ne tse ka holimo lokong, e bile e bonahala e sebetsa hantle, empa ho behelloa ka thoko ha mokoetlisi oa eona ho ile ha ama papali ea eona. Ho sa le joalo, ho reka le ho rekisoa ha libapali mekhahlelong e fapakaneng ea liki e butsoe ka la 1 ho isa la 31 Pherekhong 2025, ho latela melao le melaoana e tsamaisang Mokhatlo oa Lesotho oa Papali ea Bolo.

Lelapa la bolo le mesarelong

Tšeliso Thakholi

Lelapa la bolo ea maoto le oele ka phatla kamora ho lahlehela ke eo e kileng ea e-ba moletsaphala oa boemo ba machaba oa Mokhatlo oa Lesotho oa Bolo ea Maoto (LeFA), ebile e le setho se matla sa Komiti ea Baletsaphala, Monghali Sello Mokhesuoe ea hlokahele kamor'a bokulo ba nako e telele. Tahlehelo ena e sarelitse lelapa la hae le la bolo ea maoto haholo. Melaetsa ea matšeliso ho tsoa ho barati le batšehetsi ba bolo ea maoto, mekhatlo e fapakaneng ea lipapali ho kenyeletsoa le LeFA le Mokhatlo oa Lesotho oa Baletsaphala o hlahositse ka Molula-Setulo oa ona, Monghali Teboho Mpiti hore lefu la Monghali Sello Mokhesuoe ke tahlehelo e kholo kahare ho lelapa la papali ea bolo ea mao-

to ka lebaka la makhabane le boiphihlelo bo boholo ba hae litabeng tsa boletsaphala kahare le kantle ho naha.

O re sechaba sa Basotho se mesarelong e meholo ka ho lahlehela ke setho sa bohlokoa hakana papaling ea bolo ea maoto. A bontša hore bophelong ba hae o ba file tse molemo ka lebaka la bohloko le matla a hae kaha a ne a e-na le cheseho e kholo ho ntšetsapele baletsaphala ka ho bona hore ba hlahisa ba bang ba bacha. "Kannete re soabile haholo ka ho hlokahele ha Ntate Sello kaha e ne e le e mong oa baletsaphala ba hlomphehang haholo kahare ho Mokhatlo oa Lesotho oa Bolo ea Maoto, ka lebaka la tšebetso ea hae e ntle eo a e entseng papaling ea bolo ea maoto kahare le kantle ho naha." Ke Mpiti eo.

Ho ea ka ba bang ba mo tsebileng tsamaisong ea

papali ea bolo lefu la hae ke tahlehelo e kholo, 'me tahlehelo ea hae e sarelitse lelapa lohle la bolo ea

maoto kahare le kantle ho naha. Mofu o hlokahele ka la 15 Tšitoe ngoahola 'me o tla phomotsoa

borokong ba hae ba ho qetela motseng oa Khu-betsoana, Berea ka la 11 Pherekhong 2025.



Lerato la ka ke pina-Hlalele

Tšeliso Thakholi

Khalala ea 'mino oa koriana ebile e le morutoana ea sa tsoa phethela lithuto tsa hae Sekolong se Phahameng sa Boqate, Thabo Hlalele o re lerato la hae ke ho bina, 'me talenta eo ea 'mino e ka 'na ea qetella e oetse seretseng ha feela a ke ke a fumana Mosamaria ea molemo ho mo thusa ho hatisa 'mino oa hae. Sena o se boletse puisanong le Koranta Ha 'Nelese, Maseru ka la 6 Pherekhong 2025.

O re 'muso le bafani joalokaha ba tšehetsa lipapali kahar'a naha ba lokela ho mo tšehetsa e le hore talenta ena e tle e se ke ea felella feela, "etsoe bobeli 'mino le lipapali ke li-eathoteng li bapile." A re sena 'muso o ka se etsa ka hore selemo le selemo ha o abela lipapali lichelete le bona e le libini o ba khaketse e le hore ba tsebe ho hatisa 'mino oa bona.

A hlalosa hore hajoale o boemong ba ho hatisa lipina empa o haelloa ke lichelete tsa khatiso. Ka hona o hopotse ho tsoa letšolo selemong sena se secha ho ea itela ho 'muso le ho ea batla likampani le batho ba boithatelo bo botle ho mo tšehetsa ho ea hatisa 'mino oa hae.

Thabo Hlalele ea sebetsang ka thata ho khaola maseka le ho tilinya koriana le moropa lipapaling tsa bana tsa setepe le metekeng e meholo ea manyalo, o re leha e le mona a rata ho ba lesole h'a sheba lehlakore leo feela, empa nakong ena eo a ntseng a emetse mohlang ho hiroang ka sesoleng, a ke ke a lula feela, o ntsa a ntšetsa pele talenta ea hae ea 'mino eo a e hlalositse a e sietsoe ke nta'ae kaha e ne e le sebini sa 'mino oa famo.

O re lerato la hae 'minong le fetohile thuto le keletso ho bacha hore ha ba lokele ho lula feela, ba sa etse letho empa ba ntse ba e-na le litalenta tseo Morena Molimo a ba fileng tsona, tseo ba ka tsebang ho iphelisa ka tsona. O re bacha ba bangata ha ba qeta ho fumana mangolo a bona a thuto b'a nka ba kokota li-ofising ba batla mosebetsi, ho e-na le hore ka mangolo ao ba seng ba ntse ba e-na le na ba iqalle mesebetsi ho latela litalenta tsa bona tse fapakaneng.

A tiisa hore bacha ba



tšoanela ho tsepama holima seo ba se batlang. "Haeba ke 'minong ha ba sebelise talenta eo ea bona ho ntšetsa pele bophelo ba bona." O

boletse joalo a bile a eketsa ka hore bacha ba tsepamise maikutlo a bona holima litalenta tsa bona. A qetella ka hore kahar'a selika-likoe sa

'mino ha ho bonolo, empa motho ea nang le lerato la seo a se etsang a ka tseba ho atleha ho hlola liqholotso tseo a tobaneng le tsona. A

re e se e ka 'Muso oa Lesotho ka Lekala la Tikoloho, Bohahluali le Bochaba o ka ba thusa ho kenya letsoho kholisong ea 'mino.

Lipapali li phutha bacha

Tšeliso Thakholi

Ha e se mokhoa ke molao hore litikoloho tse fapakaneng tsa Maseru le Berea, li bokeletse bana ka metse ea tsona e fapakaneng, ho keteka 'moho lipapali tsa Sesotho le setepe matsatsing a phomolo ea Keresemese le ho bula Selemo se Secha.

Ho ka qolloa mokete oa selemo le selemo o tumeng haholo oa lipapali tsa

mokhibo, ndlamo, litolobonya le oa tantši o tšoarelolang motseng oa Ha 'Nelese Seterekeng sa Maseru. O mong oa lipapali tsa bochaba o atisa ho tšoarelola Ha Sanaha tikolong ea Koro-Koro nakong eo likolo li koetsoeng. Mokete o bulang selemo sena se secha o neng o atlehile haholo o bile Ha 'Nelese, Maseru ka la 1 Pherekhong 2025, 'me o ne o kenetsoe ke lihlopha tse 'ne e leng 'Nelese le Mafikaneng tsa Maseru, Motjoka le Ntjabane tsa Berea.

Ka lilemo tsena tse ngata, mokete o atlehile ho khobokanya bana, bacha le batho ba baholo, le ba metse e mabapi le moo o tšoaretsoeng teng e kang Masianokeng, Abia, Makhoakhoeng, Ha Bosofo le Ha Matala, 'me o bonahala o ntse o atleha selemo le selemo.

Mokete ona o hlalosa ke e mong oa bahlophisi Monghali Retšelisitsoe Goodman morero e le ho thibela bacha ho ea liketsong tsa botloko-tsebe ka nako ea Keresemese le ho ketekoa Selemo

se Secha. O boetse o phahamisana moea oa lerato la lipapali tsa Sesotho kahar'a bacha. Ka holimo ho tsohle, Goodman o re pele ho lipapali bana ba fuoa malebela a ho ipaballa mafapheng a fapakaneng a bophelo e le ho ba thusa ho ba le bokamoso bo phethahetseng.

O re monongoaha ba ile ba etsa qeto ea hore lihlopha li bule selemo ka ho hloisana ka papali ea setepe feela, e le ho fa lihlopha monyetla oa ho ithlophela lipapali tse kang tsa mokhibo, mohobelo, litolobonya le ndlamo litlholisanong tse hlahlamang tse tlang ho tšoaroa Mariha ha likolo li koetsoe. O re lipapaling tsena tse bulang selemo ha 'Nelese e ile ea ithloma pele, bobeling ea e-ba Motjoka, sehlopha ka seng se bileng teng se ile sa abeloa mohope ho ipapalitsoe le makhabane a sona a kenyeletsang hara a mang makhetha a moaparo, boitšoaro, bohloeki, ho tseba ho boloka nako, ho bontša sehlahlo nakong ea papali le lerato la papali. A qetella ka ipiletsa ho bafani ho tšehetsa mokete ona molemong oa bokamoso ba bana. A leboha bohle ba kentseng letsoho ho atlehisana mokete ona.

